



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08, 5/22 i 39/25), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU PRVE MOSTARSKJE PARTIJE

Broj: 03-07-6-363/23
Sarajevo, 17.12.2025. godine

S A D R Ź A J

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA	4
Predmet pregleda i kontrole.....	4
Cilj pregleda i kontrole.....	4
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI.....	5
5.2 PREPORUKE	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Prve mostarske partije za 2022. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je Prva mostarska partija prekršila odredbe člana 4. stav (1), člana 11. stav (1) i člana 12. stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Prve mostarske partije za 2022. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, Prva mostarska partija se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	47.472,39	100,00
8.	Prihodi od propagande (3-g)	0,00	0,00
I	Ukupni prihodi (1-8)	47.472,39	100,00
II	Ostali prihodi i drugo	0,00	0,00
	Izvori finansiranja (I+II)	47.472,39	100,00

U godišnjem finansijskom izvještaju za 2022. godinu Prva mostarska partija je iskazala rashode u ukupnom iznosu od 42.771,29 KM.

2. PREDSTAVLJANJE POLITIČKE STRANKE

Naziv političke stranke je Prva mostarska partija. Skraćeni naziv stranke je PMP.

Prva mostarska partija upisana je u registar Općinskog suda u Mostaru, Rješenjem broj: R/1-14 od 24.02.2014. godine.

Sjedište stranke je u Mostaru, ulica Maršala Tita 109.

Lica ovlaštena za zastupanje stranke su Semir Drljević, predsjednik stranke i Edin Hadžić, podpredsjednik stranke.

Lice ovlašteno za podnošenje finansijskih izvještaja za 2022. godinu je Idriz Merzić.

Prema podacima iz godišnjeg finansijskom izvještaju za 2022. godinu organizacionu strukturu Prve mostarske partije čini:

- Centrala stranke u Mostaru.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Prve mostarske partije za 2022. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju

političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskog izvještaja Prve mostarske partije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju izvršila je pregled godišnjih finansijskih izvještaja Prve mostarske partije u periodu od 2014. do 2021. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja Prve mostarske partije za 2021. godinu, izdat je izvještaj o pregledu sa mišljenjem revizora, nalazima i preporukama stranci: da finansijska sredstva obezbijedena za finansiranje stranke koristi u skladu sa utvrđenim programom utroška sredstava i za ostvarivanje ciljeva utvrđenih programom i statutom, da uspostavi blagovremene i pravilne evidencije o svojim prihodima i rashodima i da finansijske izvještaje koje podnosi Centralnoj izbornoj komisiji BiH popunjava u skladu sa njenim podzakonskim aktima.

Nerealizovane preporuke:

Na osnovu uočenih nedostataka u godišnjem finansijskom izvještaju za 2022. godinu, utvrđeno je da Prva mostarska partija nije ispoštovala sve preporuke.

5. NALAZI I PREPORUKE

5.1 NALAZI

a) Prva mostarska partija je prekršila odredbe člana 4. stav (1) Zakona o finansiranju političkih stranaka¹.

Prva mostarska partija je u godišnjem finansijskom izvještaju iskazala ukupne troškove u iznosu od 42.771,29 KM.

U svom Programu utroška sredstava za 2022. godinu, stranka je planirala ukupne troškove u iznosu od 57.536,00 KM.

(1) Uvidom u strukturu planiranih i ostvarenih troškova, utvrđeno je da je Prva mostarska partija mimo programa utroška sredstava ostvarila troškove u iznosu od 5.822,81 KM.

- Troškovi kancelarijskog materijala, troškovi sitnog inventara i auto guma, troškovi komunalnih usluga, troškovi knjigovodstvenih usluga, troškovi ugovora o djelu, troškovi platnog prometa, te troškovi taksi i novčanih kazni, prekoračeni su u ukupnom iznosu od 5.209,40 KM.

Politička stranka je prekoračila planirane troškove kancelarijskog materijala za 288,75 KM, troškove sitnog inventara i auto guma u iznosu od 330,80 KM, troškove komunalnih usluga u iznosu od 11,15 KM, troškove knjigovodstvenih usluga u iznosu od 170,00 KM, troškove ugovora o djelu u iznosu od 256,40 KM, troškove platnog prometa u iznosu od 241,20 KM, te troškove taksi i novčanih kazni u iznosu od 3.911,10 KM.

- Politička stranka nije planirala troškove goriva i maziva, dok je iste ostvarila u iznosu od 613,41 KM.

¹ U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

- (2) U godišnjem finansijskom izvještaju, u obrascu 4.1 (režijsko-administrativni i ostali troškovi) politička stranka je u okviru troškova reklame i propagande, iskazala račune dobavljača koji se odnose na izradu i montažu bilborda i plakata u iznosu od 918,45 KM, dok je u okviru ugovora o djelu iskazala ugovore koji se odnose na provođenje predizbornih aktivnosti i organizovanje dijela kampanje u iznosu od 2.506,17 KM.

Takođe, uvidom u blagajničku dokumentaciju, utvrđeno je da je stranka u gotovini isplatila dnevnice za posmatrače na izborima, te putne troškove koji se odnose na izbornu propagandu.

S obzirom da je Prva mostarska partija ostvarila troškove koji se odnose na izbornu propagandu, a da je uvidom u službene evidencije utvrđeno da nije učestvovala na Općim izborima 2022. godine, nije moglo biti utvrđeno da li su finansijska sredstva stranke utrošena za ostvarivanje ciljeva političke stranke utvrđene programom i statutom.

- (3) Pregledom finansijskog izvještaja i finansijske dokumentacije utvrđeno je da je Prva mostarska partija za utrošeno gorivo za motorna vozila, u periodu od 19.08.2022. do 29.12.2022. godine, putem blagajne isplatila sredstva u iznosu od 613,41 KM.

Uvidom u poslovne knjige utvrđeno je da politička stranka nema vlastita vozila, niti dokazuje da je za svoje potrebe koristila iznajmljena vozila, pa nije utvrđeno za čija vozila je nabavljeno gorivo i da li je isto utrošeno u svrhu obavljanja stranačkih aktivnosti.

Takođe, utvrđeno je da je stranka po osnovu fiskalnih računa, putem blagajne isplatila sredstva u vrijednosti 31,60 KM za nabavku šnala i boje za kosu od dobavljača „CM-Cosmetic Market“ d.o.o. Vitez, koje je u poslovnim knjigama evidentirala na kontu 4000-*Utrošene sirovine i materijal*.

S obzirom da na izdatim nalogima isplate nedostaju potpisi primaoca sredstava i da na fiskalnim računima nije naveden kupac, nije bilo moguće utvrditi u koju svrhu su utrošena finansijska sredstva stranke.

S obzirom da je Prva mostarska partija finansijska sredstva u iznosu od 5.822,81 KM utrošila mimo programa utroška sredstava za 2022. godinu, te da za dio troškova u iznosu od 4.069,63 nije utvrđeno da su nastali isključivo za ostvarivanje stranačkih ciljeva, utvrđeno je da je stranka prekršila odredbe člana 4. stav (1) Zakona o finansiranju političkih stranaka.

b) Prva mostarska partija prekršila je odredbe člana 11. stav (1) i člana 12. stav (4) Zakona o finansiranju političkih stranaka.

Na osnovu obavljenog pregleda godišnjeg finansijskog izvještaja, utvrđeno je da Prva mostarska partija nije vodila poslovne knjige u skladu sa računovodstvenim propisima i nije podnijela godišnji finansijski izvještaj za 2022. godinu na način propisan odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 11 stav (1) i člana 12. stav (4) Zakona o finansiranju političkih stranaka

- (1) Prva mostarska partija nije Centralnoj izbornoj komisiji BiH dostavila odštampan obrazac 1.1 godišnjeg finansijskog izvještaja (teritorijalna organizacija) ovjeren potpisom ovlaštenog lica i pečatom političke stranke, što je suprotno odredbama člana 3. stav (1) Pravilnika.
- (2) Politička stranka je u poslovnim knjigama i obrascu 2.1. iskazala sljedeće podatke o stanju i prometu putem blagajne: početno stanje u iznosu od 41,72 KM, ukupan promet ulaza u iznosu od 5.730,00 KM, ukupan promet izlaza u iznosu od 5.678,32 KM i stanje na dan 31.12.2022. godine u iznosu od 93,40 KM.

Uvidom u blagajnički izvještaj br. 12 za period od 01.12.-31.12.2022. godine utvrđeno je da je saldo na dan 31.12.2022. godine iznosio 93,46 KM. Iako se radi o novčanicama u realnom obliku, stranka je njihove isplate i stanje na blagajni evidentirala u nepostojećim apoenima.

Kontrolom blagajne političke stranke utvrđeno je da blagajnički izvještaji nisu vođeni na dnevnom nivou. Takođe, u postupku pregleda finansijskih izvještaja, utvrđeno je da pojedini

nalozi naplate nisu potpisani od strane blagajnika i nisu odobreni za knjiženje. Isto tako, utvrđeno je da dio naloga isplate ne sadrži potpis primaoca sredstava.

- (3) Uvidom u finansijsku dokumentaciju političke stranke i knjigovodstvene isprave utvrđeni su nedostaci kod dijela računa dobavljača koji su knjigovodstvene isprave o nastalim poslovnim događajima². Takođe, utvrđeno je da računi nisu ovjereni za knjiženje i plaćanje.
- Uvidom u račun dobavljača „faceart“ d.o.o. Goražde broj: 22-3000-000133 od 20.09.2022. godine u iznosu od 1.408,30 KM, račun dobavljača „DEMAS“ d.o.o. Mostar broj: 22-3901-000176 od 20.09.2022. godine u iznosu od 175,50 KM i račun dobavljača Agencija za promociju „AMS GRAFIKA“ vl. A. M. Sarajevo broj: 95/22 od 21.09.2022. godine u iznosu od 561,60 KM utvrđeno je da isti ne sadrže potpis korisnika usluge, odnosno potpis primaoca robe.
 - Kontrolom blagajne utvrđeno je da je stranka isplatila sredstva u iznosu od 190,68 KM po osnovu fiskalnog računa broj: 364178 od 30.12.2024. godine dobavljača „BINGO“ d.o.o. export-import Tuzla, a koji se odnosi na nabavku igrački i društvenih igara. Uvidom u račun, utvrđeno je da na istom nije naveden kupac, te da nalog isplate iz blagajne ne sadrži potpis lica koje je primilo novac, čime dokumentacija ne ispunjava uslove potpune knjigovodstvene isprave.

5.2 PREPORUKE

Preporučuje se Prvoj mostarskoj partiji da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva obezbijedena za finansiranje stranke koristi u skladu sa utvrđenim programom utroška sredstava i za ostvarivanje ciljeva političke stranke,*
- *da poslovne knjige vodi u skladu sa računovodstvenim propisima i da obrati pažnju na ispravnost knjigovodstvenih isprava,*
- *da finansijske izvještaje koje podnosi Centralnoj izbornoj komisiji Bosne i Hercegovine dostavlja na način propisan Pravilnikom o godišnjim finansijskim izvještajima političkih stranaka i*
- *da uredi izvještavanje o gotovinskim transakcijama putem blagajne u skladu sa važećim propisima i principima blagajničkog poslovanja.*

KOMENTAR

Prva mostarska partija je dostavila očitovanje na nalaze revizije date u Preliminarnom izvještaju o pregledu godišnjeg finansijskog izvještaja za 2022. godinu. Stranka je u očitovanju navela da je dio sredstava koristila za promociju svog kandidata koji se nalazio na listi druge političke partije, čime je potvrđen nalaz revizije da finansijska sredstva nisu korištena u skladu sa odredbom člana 4. stav (1) Zakona o finansiranju političkih stranaka. Takođe, u očitovanju stranka je navela da su sredstva koja su utrošena na kupovinu igračaka i društvenih igara, korištena za izradu novogodišnjih paketića, te je u skladu s tim nalaz revizije korigovan. U ostalim dijelovima izvještaj ostaje neizmijenjen

Šef Odsjeka za revizijske poslove

Sanja Tošović

Šef Odsjeka za predrevizijske i administrativne poslove

Rijad Selmanović

Pomoćnik revizora

Dragomir Elez

² U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.